

# LUNARI pal 1998



## Il Mestri Pino

Alt, sevêr, cu' lis ghètis blancjs, quan'ch'al passava pal paîs a cjal da so bicicleteta nera, cui ciapins tai bocui da braghessis par ca no si sporcin di smîr da cjadena, apena ch'a lu viodevin, duc' lu saludavin disint: - bon di siôr mestri - e lui ricambiava il salût alçant apena il cjapiel dal cjâf.

Il mestri Pino (Giuseppe Plezzi) al è nassût a Romans tal 1897.

Al à fat i stûdis magistrài a Gardis'cja dulà ca si è diplomât tal 1919 dopo ca chisc' si vevin fermât tal 1915 par via da uèra.

Tal 1920 lu cjatìn educatôr a Fara e dopo senza interuziòn, a Romans dulà ch'â dât dut sè stès.

Il President da Republica, su proposta dal Ministeri da Publica Istruziòn, j à conferiti il diploma di benemerenzia di prima classe, cu' la possibilitât di ornâsi di medaja d'aur par vê fat 40 ains di bon insegnament ta scuelis elementârs dal so paîs, tirant sù una vora di generaziòn di frûz ca di pari in fi lu àn vût coma mestri.

Dal 1929 al 1953 al è stât Judiz conciliatôr a Romans, tal 1930 al è diventât organist e mestri dal coro da glesia, coro ch'al era vant e onôr da glesia e di duta la comunitât romanesa.

Al à ricuviart ancja l'impegn di Comissari prefetizi dal 16 di avòst 1954 al 17 di zenâr dal 1955.

Nus à lassât tal 1967, ma una vora di soi scuelârs ancjamò lu ricuardin.